

Inuit inissianik pisortat najugaqarfiutaani attartortuusut kisiannili inigisaminnit anisitaasimasut, allamik sarfalersukkamik, imermut aqquteqartumik aammalu kiassarneqartumik inissaqartinneqartarnissaat taamatullu ilaqutariit meerartallit minnerpaamik iganissamut kissartuliornissamullu periarfissaqartinneqartarnissaat pillugu inatsisitigut illersungaalernissaat siunertaralugu, UPA 14-mut malittarisassiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaqaq Juliane Henningsen, Inuit Ataqatigiit)

Akissuteqaat

(Ineqarnermut, Pinnngortitamut Avatangiisinullu Naalakkersuisoq)

Siullermeerneqarnera

Inatsisartuni ilaasortaqaq Juliane Henningsen Naalakkersuisut kingusinnerpaamik UPA 2014-imi nalunaarusiornissaannik, taamaalillunilu attartortut pisortat inissiaataannit attartortittakkanit anisitaasut inatsisitigut illersugaasumik innaallagissersugaasumut, imilersugaasumut kiassagaasumullu inisseqqinneqartalernissaannik Inatsisartuni aalajangiiffigisassatut siunnersuummik saqqummiussivoq.

Inissiamik annaasaqarneq inissiamullu inisseeqqiffiusumut nuutsinneqartarneq attartortup annertuumik annaasaqaatigisarpaa. Anisitsisarneq tamatumalu kingorna inisseeqqittarneq anisitaasumut inuiaqatigiinnullu akisuujuvoq. Anisitaasup pequtini, taamaalillunilu pigisani, ukiut ingerlanerani katersorsimasani annaasinnaavai. Inooqatigiinnikkut ajornartorsiutit annertusiartorsinnaapput, aammalu anisitaasup akiitsuminik akilinngitsuukkanik inissiaatileqatigiiffimmut akilersuiniarneq ajornartorsiorfigisinnaavaa.

Angerlarsimaffilli atorsinnaasoq tamatigut angerlarsimaffimmut toqqissisimanartumut kisimi tunngavissaasanngilaq. Assersuutigalugu imigassamik aamma/imaluunniit ikiaroorartumik atornerluineq atugaasimasinnaavoq, allanilluunniit peqquteqartumik najugaqartut sulinnarsinnaaneq akiitsunillu akilinngitsuukkanik akilersuinissaq ajornakusoortissinnaavaat. Akiitsut akilinngitsuukkat akilereerunikkut, aammalu utaqqisut allattorsimaffiannut allatsissimagunik inissiamik attartortittakkamik allamik tunineqarsinnaapput. Taamaattumik nalunaarummik pingaarnersiuffiunerusumik tamakkiinerusumillu, inissianik inisseeqqiffiusartunik atuisarnerup ingerlasarneranut nassuiaateqarfiusinnaasumik suliaqartoqarnissaa Naalakkersuisut kissaatigaat.

Nuummi pisariaqartitsisoqartoq paasineqarmat, kisermaanut inisseeqqiffiusartumik sananissaq Naalakkersuisut sulissutigaat. Unnuiffissamik atorsinnaasumik peqartinnagu, inissiani inisseeqqiffiusartumi najugaqartut kisimiissinnaanertik ataatsimoorsinnaanertillu ajornartorsiutigisarpaat. Inissiamut atorsinnaasumut inissinneqarnermikkut aamma ulluinnarni inuuneq nalinginnaanerusoq angusinnaavaat. Tamanna inissiani inisseeqqiffiusuni najugaqartut tamarmik, pingaartumillu ilaqutariit meerartallit pisariaqartippaat. Taamaattumik nalunaarusiortoqalinnginnerani unammilligassat inissiani inisseeqqiffiusuni najugaqartunut tunngassuteqartut arlallit misissuiffigineqarnissaat Naalakkersuisut kissaatigaat.

Inissiani inisseeqqiffiusuni najugaqartut aningaasaqarnermik attanniarnissaanut unammilligassaqsinnaapput, taamaattumillu siunnersorneqartariaqarput ilitserorneqartariaqarlutillu. Kiisalu inissiani inisseeqqiffiusuni najugaqartut, akilinnngitsuukkaminnik akiitsullit inissiamik namminneerlutik inigisassaminnik pissarseqqinnissaat anguniarlugu suliniutinik pinaveersaartitsiviusunik pisariaqartitsisoqarpiarnersoq misissorneqarnissaa Naalakkersuisut kissaatigaat.

Tamatuma saniatigut inissiani inisseeqqiffiusuni najugaqartut ingerlaqqinnissamut periarfissaqaratik inissiani inisseeqqiffiusuni najugaqaannartannginnissaasa qulakkeerneqarnissaa Naalakkersuisut kissaatigaat. Taamaattumik inissiani inisseeqqiffiusuni najugaqartunit arlallit inissiani taamaattuni ukiuni amerlasuuni najugaqaannartarnerat pitsaasuunngilaq. Tamanna pissutigalugu inisseeqqiffiusumi najugaqarnissap sivisunerpaamik ukiup affaanut killilerneqartalernissaata sulissutigineqarnissaa iluaqutaasinnaavoq, taamaalillunilu piffissami sivikinnerusumi inisseeqqiffiusumut inissinneqartarnissaq, kiisalu najugaqartup inissiamik nammineq najukkaminik pissarseqqinnissaa sulissutigineqassaaq.

Naalakkersuisut siunnersuummut qujasorujussuupput, aammalu pineqartup ataatsimiititaliamit misissuiffigineqarnissaa qilanaarlugu. Tamanna tunngavigalugu immikkoortup taparserneqarnissaa inassutigineqarpoq.